

五、先祖传记

（一）士龙公房

古塘公传

公讳士龙，字见田、号古塘。少随父守洪州，后从乃兄士衡由洪州徙吾邑西乡，选胜于湖源、岱华之间。博学多才，著作等身，下笔千万言，雅不存稿，草就辄焚之。与乃兄士衡有云间二陆之目。时值南北扰攘，屡受以官不拜。寄傲湖湘，极楼台池沼之乐，作藕塘、盘塘、船塘，创大楼屋，徜徉其间，弹琴咏歌，以自怡悦。迄今二百余年，其遗迹犹可指而数也。犹传其登湖源、岱华峰顶，荡胸云海，或共山僧手谈，茶话终日，至晚年杜门扫轨，人亦罕见其面，袭父荫以承仕郎终。其嗣公发昆仲，富而好义。湘平接壤，直隔大江，公为建桥，费赀数千金。后被蛟害，仅遗二墩，至今父老流传，犹以桥墩名其地云。

明进士出身任云南布政使司同邑后学黄昭道撰

元礼公传

公讳元礼，字振仲、号桥溪，宋左仆射、讳敏中公十一世孙，承仕郎、讳士龙、号古塘公之玄孙也。公自古塘公迁居张古塘，子姓愈蕃，因移家于境内之桥墩，遂为桥墩、坪上、盘塘、双港、灰山之始祖。

由前明以迄本朝，祀典罔缺。康熙年间，各房诸伯叔：雪公、会元公、惠臣公、视远公、仲昭公、在位公；宗裔诸公暨诸兄：显士、尊视、大任、子赞、帝庸、琼英诸公；侄辈：越南、兼善、子俊、正青、士彦、选才、于众诸君；皆私置祀田，或出地租，为一切经费。更隆孝享，雍正庚戌春，岐后同各房人等，重修石墓，湘邑孝廉杨公讳之炳者，为作墓志，叙述源流，颇为详悉，而于公之生平行谊，犹有未能缕述者，岐用是据公所订旧谱，考其懿行，以列诸传。

公性聪敏，端慝仁厚有余，读书持大体，于前明洪武四年，与其兄明经元福公暨从弟元禄、元德诸公，手订家谱，原原本本，考析详明，生其后者皆有可据。公德配陈孺人暨张、许两孺人，举子

六：一讳有澆，次有奇、次有全、次有德、次有宏、次有光，迄今瓜绵椒衍，或列成均，或登黉序，其敦诗书而崇礼让者，皆后先相望。又何莫非我公厚德所留貽也。岐不敏，未能导扬先烈，第即公之承先而启后者，详其颠末，以志不朽云。

裔孙邑庠生朝岐凤鸣甫谨撰

为楚公传

公讳为楚，字斗南、号云影，宋太尉文简公裔孙，讳以琦、字少瑋公之子也。吾族自士龙公昆仲宦籍南来，世居平邑。至十六世祖可驥公迁湘邑门斗山，即公之大父也。

公承旧业，仍居其地，原配吴孺人，继配黄孺人，生子二：世卿、世禄，孙三：本聘、本聪、本联，公歿后，其后嗣复居平邑双港、黑门楼。自公迄今二百有余年矣，卒葬墓碑俱详谱系，嘉言懿行不可得而尽知，惟闻公才而有德者也。湘阴邑侯赠以《镇俗善士》匾额。后检旧篋遗书，得公手书一纸云：吾幼从父训，始受小学四书，继遍五经、史传、诗、古文词，颇为先达称道，予亦期有成就也。以终鲜兄弟，不欲以家事累吾父，年甫冠，遂废学，经理出入，存心悉本，忠厚处世，不外端方，所为不过如是而已。然予怀终有未快，惟冀后人：毋诿于质，毋阻于贫，毋狃于习，努力诗书，潜心德业，以黼黻朝廷，庶有以绍承先烈而慰予隐衷也。后录文简公答寇公诗云：九万鹏程振翼时，与君同折月中枝，细思淳化持衡者，得到于今更有谁。公诚有志于光前而裕后者，孙等捧读彝训，曷禁悚然，第恨德薄材薄，未能恢宏先绪，惟即公之所书以示我后人者，用志不忘云尔。

裔孙邑庠生贵钧陶吾甫谨识

世杰公传

公讳世杰，字添鼎，古塘公十四代孙荆美公之冢君也。负性宽厚，植行端方。兄弟四，公居长，自幼恪遵庭训，苦志攻书，不波靡，不浮嚣，闭户潜修，三年不志于谷，故其为文奥衍，每下一语，令人十日思。不利名场，循例纳职，非其志也。

越后兄弟析箸，敛心戢志，竭力经营，日用云为，不尚奢侈；既而蓄积益厚，创业益多，而公克俭克勤之志亦复如故初，不以富有而自矜，此以见公之立心也远，而所志者大也。德配陈孺人，幽闲贞静，协力操持。举子五：长讳本禄，负性敏捷，磊落不羁，公乃延师课读，不数年，克拾芹香，用承厥志。次本泽、次本浩、次本溢、次本滨，类皆教以义方，克家有道，公分以田园屋宇，一子一庄，各守其业。今观其孙曾崛起，继志述事，克绍鸿模。虽其子孙奋发而为之，抑公之燕冀以永之也。吁！始则无惭实学，继则克遂成家，一生有守有为，较诸碌碌无奇者固殊，即营营势利者又翹然特出也。

公之名为杰，亦杰士也哉！

国升皋臣氏谨撰

松谷公传

公讳本建，字视远、号松谷，古塘公十五代孙也。世居桥墩之曹公冲，以耕读世其家，为人长厚，公直内刚外和，衣冠言动，一率其真，其朴拙之状，有古人风。宗族乡党争曲直者，多不质于官，公至以片言理释之，俗呼为里长官。

德配孺人伏氏，对食齐眉，克勲内政。嗣子二：一讳朝榜，一讳朝彬。公课子严毅，耕读并饬。长君榜有文武才，皓首穷经，竞厄童试，其公平善俗，饶有父风。季君彬，宽仁大度，不立崖岸，近来徙居石泉，号质庵先生，一时二难并美。孙曾辈出，或列成均，或登黉序，望重一时。

予与令嗣孙晓庵、试陞诸君，同事笔砚，兼叨戚好，因得悉公之行，撮其大略，并叙及后人，以见公之积后而流，方兴未艾者，其渊源为不可没云。

敕授文林郎乙卯举人岳州府华容县教谕姻世侄
杨琳撰

颖川公传

公讳本泽，字惠臣、号颖川，古塘公十五代孙。讳为球、字金美公之孙，讳世杰、字天鼎公之行二子也。德配湘邑罗孺人，举子六：长讳朝富，次讳朝寿，次讳朝安、字奇清，次讳朝定，次讳朝宝，次讳朝宗，世居平邑十六都之坪上。公为人醇谨端方，丰姿岸异，负伟器，制行高洁，品重乡评。其天性仁孝，昆仲五，一堂雍睦，式好无犹，咸以横经负来世其家。

其嗣子长君、仲君、叔君皆下世，尔时行三子字奇清者，年高德邵，寿逾八旬，饱饫天和，颐养自得，其浑朴刚直饶有先人之遗风焉。偕孺人黄氏，白首同心，娱情泉石，两辟山庄，一名石头坡，一名黑门楼。嗣子四：长讳廷秘、字香茂，次廷圣、字学孔，次廷贤、字士希、号梅亭、一号石坡，次廷魁、字拔群。乾隆甲辰春，奇清命行三子讳廷贤、字士希者助建宗祠，与龙公房文彦、以成、希成、万选、从先、兼万、统四、成才、搏万、元善诸公暨衡公房秉钧等，渊公房九均等，分任其劳，输忱效公，始终罔懈。且更与石溪居士讳阮贤者，共勸家剩。自甲辰迄己酉凡六载，祠、谱

兼成，士希与予为诗文友，因述其后先家世，丐与一言为乃祖颖川公立传，爰纪其颠末，勒诸谱端，以见后人之树立有由，且思颖川公之垂裕于后人者为不朽云。

现任广东韶州府事年姻世弟余有勋撰

芸崖公传

公讳本宾，字会元、号芸崖，古塘公十五代孙。天鼎公之行五子，邑庠生士清公之王考也。祖居坪上，后迁湖源峰下之晏家洞居之。公醇厚朴直，传其读书时，凡古人格言壮语，必铭诸座右。昆仲五，公晚出，长兄时为学博，授以幼仪、内则诸篇，即恂恂修弟子之职。比长，洞观世务，约以自奉，宽以待人，族里乡党间有不平之事，皆争执于公，屡举乡约，宣讲法律，动履不苟。家素封，每遇岁歉，辄减价出糶；有称贷者，或减息，或焚券，不索偿。好布施，凡桥梁、寺院、神像等项，公独捐金为众人倡。邻右有匱乏者，不计多寡周之。尝语人曰：人生如秋露耳，当随分随缘，斤斤焉较锱铢以肥家身、长子孙，多恐其不终用也，其教诸子侄类如此。配孺人郭氏，性慈惠温恭，与公齐眉对食，白首同心。举子二：一讳朝标、字位高，一讳朝樛、字万旻，女一：适湘邑陈讳有孚，公享年七十有四，孺人享年九十有六，湘邑孝廉知江夏县事吴公讳翼行者题其堂曰：“厚德凝休”。孺人后公十八年卒，一时曾孙辈出，五代一堂，其貽谋之裕、福泽之隆，被及后嗣，论者咸称为积善获报之有自云。

谱局族曾侄孙邑廩生石溪阮贤谨撰

远村公传

公讳朝瞻，字尊视、号远村，古塘士龙公十六世孙，本宪（注：原“宪”字脱，据谱补上）公之行六子也。原配湘邑万孺人，举子二：一讳廷咨，次廷宪。继配湘邑陈孺人举子二：一讳廷仁、字统四，次廷智、字国文。公性鲠直，有决断，族里间有不平者，皆质成之，不直于官。传家极严谨，内外肃静，尤笃于本根。昆仲六，孝友一堂，式好无间，居恒惓怀祠、谱，恨未亲睹其成，赍志而逝，得年七十。公嗣君字统四者，绍成父志，先年拟纠龙公房一支私创祠宇，因祀田未就，不果行。近年衡、龙、雄、渊四大房有合修祠、谱之举，统四兄身任首事，力赞其成，祠、谱两事，焕然一新，真不愧远村先生之肖子也。

族侄邑庠生廷翰挥毫甫拜撰

宴林公传

公讳朝翰，字琼英、号宴林，士龙公十六代孙，本诏公行二子也。公性仁厚，寡色笑，胸填经史，幼厄科第，养望林泉。原配龚孺人，举子二。继配方孺人举子一：讳廷秀，字以荣、号玉圃郎，宴林公三子也，为人醇谨端悫，饶有父风，宴林公每钟爱之。及宴林公下世，玉圃与乃兄尊荣、安荣克承父志，友爱一堂，诗书礼乐兼事农桑。玉圃娶张氏，嗣子三：一讳重能、次重庄、次重源，近年贵族合修祠谱，举玉圃为房长首事，玉圃身任其劳，共勩乃事，凡六载，祠谱兼成，得慰宴林公生前未了之愿。兹当家乘告成之候，为之叙其颠末，以流示于后云。

年姻眷世侄邑庠生熊健鸾符氏谨识

石泉公传

公讳朝彬，字文彦、号石泉、一号质庵，太尉文简公遗裔，古塘公十五代孙，讳本建、号松谷公行二子也。同怀昆仲二，公其季也，长兄讳朝榜、字希圣，先公年卒，其行事具详本传中。

公性宁静淡泊，宽仁大度，不立崖岸。尝以恕道持身，乡里族党争重之。幼读书，不治章句；比长，谙世务，侃侃持大礼。凡施济交游，靡不称善。其生平无败行，亦无废事，尤重文学。其侄讳廷翰、字晓庵者，自入学以及乡试，屡深作养，如诸子侄及他人之贤肖者，悉加礼爱惜之。公世居邑西十六都之坪上，分迁曹公冲，近复卜居本都之石泉，即号石泉老人。

德配刘孺人，举子三，女二：一适李讳家贤、字楚才，一适邑庠生李讳天辅之长子家。嗣君长廷选、字试陞，现游太学生，次廷举、字清伊，次讳廷拔、字士魁，俱业儒，雅负文望。

乾隆甲辰春，我族建修祠、谱，举公与家叔鉴亭诸公为族中总理，公望隆德厚，分且尊，为衡、龙、雄、渊四公子孙之长，公尽心祠谱，不辞繁剧，宿夜经营，几废寝食，捐资二百余金，为族众倡自甲辰迄

己酉，岁凡六载，祠已成而谱事亦将竣，是岁公染疾且笃，至冬杪，犹再三强起，冒风雪赴祠，经理庶务祭祖时，默告宗灵，愿延残喘，得分发家乘，死且瞑目，由是病小愈，谱亦挨次颁发，公命嗣君等携谱就床第展视抚摩，声泪俱下曰：“吾今者可以报祖宗于地下矣，但祠、谱中尚多未了之绪，乍难枚举，倘后有兴作，愿汝曹量力助理之。”言迄不及他事，端坐而逝。呜呼！公之嘉言懿行，难以缕述，即惓惓祠、谱二端，已可想见矣。公生于雍正六年七月二十三日 时，卒于乾隆五十五年庚戌岁二月二十七日 时，得年六十有三，以乏期未定，存枢堂东，故于宅兆未及预详时，谱已成于己酉冬，惟传赞一部尚在刊发，族人以公之毕生功德不可忘，爰命阮即其行事，补叙传赞中，用以昭兹来许，为后人观法焉。

乾隆五十五年庚戌岁三月上浣之五日
族曾侄孙邑廩生石溪阮贤景思甫谨撰

文炳公传

公讳朝佐，字文炳、号虎泉，龙公十六代孙，世居平邑西乡十六都之坪上，讳世儒、字若圣、号达齐公之孙，讳本昌、字尔炽、号艾亭公之子。昆仲三，公性醇谨笃，实有古人风。幼业儒，恪宗先正，探濂、洛、关、闽之澳，湛深经术，志洁行芳，不苟科第。

德配赵孺人，举子二：长君讳廷洪、字禹平、号距川，次讳廷泮、字思乐、号芹池，公严督课，其长君禹平先生，初受学，公教之自小学始，即口授幼仪、内则诸篇。比长，使治文艺。凡植品型身，力追先辈，久困童子试，遂废书，公亦下世服关。禹平先生以贤世遗书，不忍弃，仍率子侄辈复理旧业，不治资产。其嗣君讳重庆、字卿云、号瑞斋者，负异姿，聪颖端悫，屏绝浮夸，专攻举业。先从家塾晓庵先生游，诒就外传，即从族中石溪先生，肄业于湖源峰下之西来寺。穷经考道，几历晦明，得操强弩，试无不利。乾隆壬辰春，授知于文衡褚筠心夫子，补弟子员，试辄高等。禹平先生曰，今幸读书，粗有成就，恨未起吾父而一见之，为可慨也。法境接湘平，忝为

瑞斋先生子婿，因耳熟虎泉公流风余韵，不揣固陋，为之立传，并叙及渊源，以见蓄道德而能文章者，不报之于身即报之于后人也。

曾孙婿湘邑太学生杨起法拜撰

丕成公传

公讳朝明，字丕成、号镜斋，古塘公十六代孙。讳本富、字仲昭公嫡嗣也。世居邑西之盘塘。德配童孺人，举子三：长讳廷华、字景虞，次廷美、字周才，次廷彩、字星耀。时俱业儒。

公性刚介，英姿飒爽，为儿嬉戏时即磊落不羁，人卜为出群器。比长，膺世务，遇事有裁制，守正不阿，乡里重之。

公自幼秉承家教，好读书，性聪慧。乾隆二十三年，乡试名列平邑前茅，尔后，耕不误读。天道酬勤，乾隆三十五年，逢盛世入登上榜。次岁受钦命赴湘省岳州辅政，后任知州，履职八载。在位勤政尽忠，务实恤民，遇强不惧，见弱相扶，清风有赞，扬大耐家声，响誉三湘。治理洞庭根水患，坚固新堤保民安，为湘楚之民立下汗马功劳。

公因勤政，积劳成疾，体虚患病，难为支撑，乃辞官告假，荣归故里。钦赐《敦德致祥》橡木金匾，悬挂盘塘老屋正堂，供后人崇拜敬仰。公回故里，走近乡邻，为人谦逊，重义疏财，热衷地方事

业。修桥补路，砌坝整塘，事事为首。领导捐资，接济贫困，有求必应。为保一方风水，造福百姓，公出重资，倡修七层石塔，屹立湖源、岱华之间。有诗为证：盘塘聚源明如镜，雕浮倒影卧龙行，水润桑田百业旺，塔镇宝地万代兴。

昆仲七，公行六，兄友弟恭，式好无间。其严君仲昭公，风格骏厉，家素封，质而文，俭而有礼，诗书之外，兼治农桑，人每奉为型家模范。公之昆仲克绍箕裘，户口日繁，而家益愈扩，虽席丰厚而其严取与戒浮夸、慎交游，克家之肖子焉。乾隆甲辰春，我族创修祠、谱，举公之行三兄以成公者为祠谱总理，公与行五兄绍成暨行七弟希成公等，或为首事，或为房长，兄弟轩昂，皆老成持重，捐资百金，戮力同心，助修祠、谱，洵推一门之盛。至乾隆己酉岁，祠、谱兼成，公即于是岁捐馆。

呜呼！以公具过人之才略，兼昆仲之豪俊，相为羽翼，其奋兴正未可量也，而乃中道弃世，悲乎！然要其后嗣之林立，当必有企前徽而争光于家乘者。兹为纪公生平之大概，勒诸谱端，可见传家有道者，卒能承先而启后焉。

公七代裔孙 泰惊 泰白 泰鸣拜撰

公元二〇一六年仲冬月

士彦公传

公讳廷暹，字士彦、号续轩，士龙公十七代孙。昆仲四，公居长。为人严气正性、矩步方行、读书明理、宗正心诚意之学，所与交必端人。乡邻有不肖者，不敢质于公，多敬惮之，卒相感而化，咸称为道学先生。其先君下世早，公奉其母张孺人，曲意承欢，孝养兼尽。公配孺人彭氏，举子八：长讳重远、次重达、次重逵、重遨、重游、重仁、重伋、重仪，植志行身，皆能守公模范。其次君讳重达，字兼万、号直斋者，秉公遗训，倡修祠、谱，用笃本根。自乾隆甲辰春迄己酉岁，凡六载，于祠、谱两事，任劳任怨，克底于成，其功亦有足多者焉，附为叙之，以见士彦公之遗命为不负云。

族侄孙邑庠生贤书遴献氏拜撰

梅溪公传

公讳廷明，字克允、号梅溪。龙公房讳朝相、字子赞公之仲君也。昆仲二，兄讳廷昭、字旭升，刘孺人出。公之生母黄孺人得公最晚。子赞公下世，兄旭升方七岁，公三岁。劳恩情于母氏者居多。先是子赞公与其兄朝黉、朝班者，孝友无间，义不析箸。世居桥墩，继迁湘邑，近返祖境之僧家山大屋场居之，丁口颇繁。梅溪公以妙龄理家事，比长，谙世务，遂废书。承藩宪吏科例满授八品职，终非其志也。配儒人彭氏，举子四：长重位、字得中、号震喈，次重熙，次重文，次重章，皆继志诗书，恪遵乃祖乃父遗命。近年助修祠谱，其于敦本笃实之意有足取焉，并叙之以见渊源之有自云。

年姻眷教弟湘邑贡生 彭端敬夫氏拜撰

荆山公传

公讳廷选，字荆山、号玉峰，龙公十一世孙有成公之冢孙，讳朝嘉、字乐宾、号雅亭公之长君，讳廷迁、字秩章公之长兄也。配孺人周氏，嗣子四：长讳重林，次重方，次重信、字天常，次重清。公为人忠厚慷慨，幼读书，博通经史，善属文，喜沉郁奥衍之作。家素裕，蓄仆马，好施与，为人解纷常倾囊息其争，不计其值，自少至老人无怨言，俗呼为有道先生。中年得疴病，同周孺人隐湖源山下之晏家洞，孺人性慈惠，与公合德，乡邻有善举，孺人与公多赞成之。曾于邻右有忧愤自经者，孺人探得之为解其系，温慰良久，得不死。公与孺人白首同心，齐眉对食，好合无间，有当年举案遗风。公得年七十有二，孺人得年七十有三。其生卒葬具详宗谱中。

乾隆五十四年己酉岁

孟冬月长邑庠生刘一桂拜撰

云亭公传

先生士龙公十八代孙，太学生怡斋公之冢君也。聪明端悫、博极群书、有大志。厄丁父忧，早膺家事。同怀弟二：一字芳绍，一字声和。尊封君谢世时，甫离襁褓，其教读婚嫁及田园庐舍，先生独理其成。事母刘孺人以孝闻，抚弱弟以友著。一时内难外侮交集一身，先生悉本以忠信笃敬，卒相感而化。晚年尤精星宫地輿、卜筮岐黄之术，倡修祠、谱，举为总理。宗里戚党，咸契重之。原配潘孺人，生女一：聘予长顽炳。继配喻孺人，生女一，子四：一讳贤谟、字圣洋，一讳贤诏、字丹书，一讳贤赞、字言扬，一讳贤诰、字商书，俱业儒。女适吾邑太学生毛輿湘之行二子、邑庠生讳棻。先生讳重雄，字搏万、号云亭，卒年六十。

诰授修职郎 原任辰州府教授

姻弟杨瑗次蘧氏顿首拜撰

畅斋先生传

畅斋先生者，世居昌江，姓向讳贵风，字春和，畅斋其号也。年甫成童，弃儒治田间事，先君子知其贤，家事悉诿之。公自奉恒过于俭，而甘旨丰厚丧葬尽礼，居然世家。于兄弟行为长，友爱两弟，数十年翕如也。岁歉，地方筹赈，或乡邻称贷，以及修圮建庙各义举，解金挥霍殊不类其居家与人无机心，戚族往来，周旋伛偻，虽款后进亦然，世俗所谓炎凉，略不知也。起家至田数百亩，而勤俭如初。生平未尝疾言遽色，和平之气溢于眉宇。其乡父老曰：人尽如畅斋，地方可不设官矣。呜呼！不贤而能之乎？

德配杨孺人，温惠性成，事翁姑未尝失态，闺门之内无诟谇声，下至乞丐叩门，暑为煮茗，冬则与烘，一日十数辈不倦，行之数十年，故其妯娌子妇辈，皆有贤声，孺人作之先也。今下世久矣，里人犹乐称道之。予谨录其尤者，公与孺人皆以嘉庆丁巳生，同治十年公卒，孺人后公数年卒。

论曰：言治者盛称五帝三王之世，尚矣！今国家政皆三代之政，民皆三代之民，而君子观于乡不免今昔之慨，吾以为政不在民而在士，如畅斋先生，天性浑厚，未知于沕穆何如，而合其生平之实行以观之，诚足愧子衿佻达之习也，殆亦依然三代之民哉！有道君子必韪吾言矣。

长邑庠生姻晚干卿刘世楠顿首拜撰

书堂公传

诰封奉政大夫向公讳贵升，吾邑人也。为祇园局总，初督办徽山团练，务求完善，邑侯称之曰能；帮办捐务会商，一门共捐军饷三千缗。除酌拟外，派次子国倬捐州同銜加二级补用，清军府例应三代请恩：钜典该公渥荷，诰封大夫第；该公之父母旋荷，貤封大夫第。悉本畎亩效忠，辉映先后，即兹可谓得显亲之道矣！

公系原河内，本来大耐家声，派衍罗湘，不愧缙绅世族，宽忍颐性，浑厚宅心。昆仲四，公行三，季弟早逝，晚年与诸兄时或会集，迭为宾主，互相友爱，言笑怡怡，尽欢始散，情弥敦于殁齿。嗣君四：长国俊，以志切观光故捐监；次国倬、次国仪、次国信，现在候补候选。其光大门闾，可立待。孙曾八九，延经明行修之师，严为课读，书斋日或数至，以大成相期，而隆师重道之意，至老弥笃，其修身教家，类皆仿照前宋朱柏庐先生格言，悉以务本为要。夫治家固贵合乎准绳，而任事尤宜具有干济。公则建支祠而捐田作基，共勸赞成；于今为烈，近地神庙被兵燹毁坏，众议重修，举为董事，与同人竭力经营，不日蒇事，较前更为宏廓，

业经中翰易堂俊碑记标题。昨因来平江访李次青，由归义过，见其庙貌然一新，既坚既好，窃叹其经理之有方。以及蠲租修堤，买舟利涉，置义渡亭，捐钱渡田，保难周急，随分施济，煮豆赈饥，苏穷扶困，声啧啧人口。非好善乐施、勇于为义者，乌能若此嘻？公之有功于国，有德于人，不大彰明较著哉？

予前署广东巡抚，告假回籍续修县志，适公孙齐泰同予侄虎宣来荷花池志局，业经开注事实，载入国史，诚不朽矣！兹复请传，予惟是仿照阐幽之典，其略于邑乘者，兹更详志于家乘，庶几日久弥新，子子孙孙。率乃祖攸行。是为传。赞曰：惟公之传，身歿名隆，象贤崇德，永世无穷。

赐进士出身、翰林院编修、诰授光禄大夫、前广东巡抚、候补侍郎、钦差大臣赏戴花翎加七级、世愚弟郭嵩焘拜撰

向母江孺人事录

孺人系江氏，太学生春明先生之女，儒生向公讳廷进、字孔庵先生之发配也。生雍正丙午八月二十六日亥时，幼即端庄，生而淑慎。年十八归向。相夫子，承欢养志，善事尊嫜，家素厚。迨诸叔伯析箸，各择衡宇，孺人与姑张孺人共处一室。适夫君外往，夜被盗，孺人冒刃卫姑，泣劝与财，趋吉免辱，幸得两全。孺人嗣子二，一讳重成、字越胜，一讳重秀、字文锦。年甫冠，孔庵公中道弃世，孺人苦励清操，午夜和丸，耕读并饬。性严正，凡一切家事，非奉慈命不敢妄行。同诸伯叔奉两尊人，生事葬祭，尽礼尽哀。凡延宾课子、和妯娌、御奴仆、周任恤，乡里啧啧，卓有贤声。时孺人年六十有四，当家谱告成之会，第即其现在之可称者，叙而述之。倘天假之年，由古稀而耄耋、而期颐，其芳徽之流播，福泽之骈臻，当有采风者扬之，彤管又宁第知今日之所云已哉！

乾隆五十四年己酉仲冬月

族侄邑庠生重望高明甫谨撰

向母伏孺人事录

孺人系出湘邑伏氏，为龙公房向公讳朝升、直松公之次媳，讳廷礼、字正位先生之德配也。年及笄，即归向。举子三：一讳重绅、字简兮，次重经、字明兮，次重伦、字纬兮。孺人性贞静慈惠，孝事舅姑，相夫子有贤声。正位先生读书时，与一时名士游，孺人司中馈，龟勉同心，誓偕白首。厄以正位先生年二十七中道捐馆，曾降真乩云为市井神，无疾而卒。孺人哀毁骨立，血泪皆枯。苦励冰操，克成夫志，俾其子皆成立，教读完娶，母而兼父。近年嗣君简兮、明兮昆仲举为房长，助修祠谱，克底于成，悉禀孺人之慈训。是亦巾幗中所罕觐者，爰为叙其略，以待表彰焉。

湘邑痒生眷内侄伏明华拜撰

（二）士寿公房

士寿公传

公讳士寿，字天福、号赐加，讳传德公之六世孙。生于宋宝庆二年（公元1226年）丙戌前后，官四川六路宣抚使，开立五十二关、三十六隘。时南宋积弱，蒙元虎视眈眈，公据荆江协吕文焕以卫襄阳。

德佑元年（公元 1275年）乙亥，野鸭塘苗蛮盛天飞、翟苗子等趁危作乱，剽劫蜀地，百姓深受其苦。公率军征讨，活擒匪首报捷，即加封四川宣抚都总管。九月又讨穿山虎有功，赐铁券便宜行事。景炎元年（公元 1276年）丙子，又讨蒲寿东，班师还镇。卒葬平江西乡茅栗岭（今平江县伍市镇童家墩）蛇形嘴壬山丙向。配孺人金氏，举子三：公禧、公德、公幸。

终宋之世，侮于辽、弱于金，中原故地生灵涂炭，江南半壁日循干戈。而我向氏祖宗无不竭力捍御于荆襄、四川之间。

奈何崖山之后再无宋。元世祖忽必烈堪为一代雄主，对反抗铁血屠城以震慑，又效法唐代“羁縻制度”，于西南边蛮地区始置土司，实行自治。公心怀仁德，为百姓免遭屠戮，率众受封，仍授旧职。

公力保一方平安，不拘小节而明大义，是亦微子启、钱鏐之俦也。

寿公世下大坤公支二十三代裔孙岳阳县向磊敬撰

大坤公传

公讳大坤，字博厚、又字能庵，生于元泰定五年（一说仁宗皇庆二年），原四川西蜀人，官武陵常德卫参将。配李氏，举子三：至道（又名忠元、元祖）、至德（又名惠元、元佑，字万寿）、至善（又名其胜）。

元至正十三年癸巳五月，泰州民张士诚乱，僭号大周。公随长兄雅祖联剿荡平，克捷还镇。至正十五年乙未二月至十七年，川湖苗蛮寇起，为征川湖苗人林天开、罗万全作乱，公叔伯兄弟十三人（即大雅、大元、大亨、大利、大贞、大乾、大坤、大潮、大虞、大夏、大殷、大周、大维），俱往成都。只憩数日，同通天侯唐定远、江夏侯唐世祥、援剿侯唐启鹏、总兵周文德、察防使赵兴罉、罉孙赵家文等，架竹排顺江而下，讨东北寇氛至巫山西南六路（夔峡），苗蛮安剿平定。至正十七年丁酉十二月，随州人明玉珍，袭据重庆，进陷成都，声势正炽，蜀中郡县相继降于玉珍。公昆仲暂避其锋，遂统兵至大树古路龙潭坪（今湖南桑植县龙潭坪乡）铸八耳大鼎，作炊聚餐。后驻两河口水

寨茶庄坪，创立舍宇，掘壕作塹环筑土城。未几，迫洪武定鼎，昆仲八人始各分地散驻。公兄弟始困于明玉珍，继迫于明将傅友德，而廷芳、景仁、大亨先后战败，殉难报国，复仇难言。公惟解卸兵权，高蹈远引，游湖南辰、常，吹角齐军，建邦立帝。

明洪武二年，公率士上山进洞（天子山黄龙洞），举义建邦，庇护一方，附近州县争相投靠。拥立称王，曰“向王天子”。明洪武帝先后派湖广平章杨景、中山侯汤和、江夏侯周德兴率大军前来镇压。公率部苦战，重创来敌，终因寡不敌众，于明洪武十八年乙丑八月，被逼至神堂湾悬崖，毅然跳崖就义。公舍身成仁，尚怜悯部属与子孙，嘱之归明或隐遁，后裔遂分散湖南沅陵、桃源、石门、常德、慈利、岳阳及湖北、四川等地。

明洪武二十二年至二十四年，在湖南武陵源（原桑植县）天子山袁家界，建成上、中、下三座天子庙（已毁），中天子庙对联：向以称王声灵显赫三千界；天其有子俎豆馨香亿万年——向世芳书。（见桑植县志618页载）

嗟乎！自古成者王侯败者寇。然我大坤祖不畏强势，爱民如子，深受百姓爱戴。迄今仍在湘西北、鄂西南等地流传着旷世英雄向王天子的传说。

尤其在张家界武陵源，几乎每座石峰、每条峡谷，都与大坤祖征战有关，留下了与之有关的众多地名，如“天子山”、“御笔峰”、“金交椅”、“向王观书”、“万岁牌”、“点将台”、“四十八大将军岩”、“卸甲峪”、“落马峪”等。在武陵源，向王天子就是主宰一切的神灵。今太平盛世，余愧为公之后裔，亦感慨莫名，特附拙联一首：

叹往昔坤祖英雄傲世 喜今朝裔孙合族团圆

大坤公二十三世裔孙岳阳县向磊沐手敬撰

元佑公传略

公讳元佑，一名至德、又名惠元，字万寿、一字旁敷，号子園。讳士寿、字天福公之玄孙，讳大坤、字博厚公之仲君也。生于至元二年（公元1336年）前后，原籍常德府武陵县城门首剪刀巷，元至正甲辰（公元1364年），宦岳州，从军授职。后随同明太祖征伐，建功立业，职授岳卫百户。洪武庚午（公元1390年），领兵征大庸洞，病卒营中，坟墓临湘垢家冲龙坡。娶郑氏，举子四：克明、克仁、克宽、克让。继娶衡州府南门燕子窝王氏，生癸酉九月十五日寅时，年八十五，卒永乐丁酉十二月廿四日辰时，葬巴陵金鄂山螺蛳港方家园甲庚向。生子二：有词（又名以诚）、有谟（又名钟毓，官授苏州太守）。

附：以诚（又名有词）公，生至正二十八年丁未（公元1367年）二月十四卯时，洪武（公元1392年）壬申，授岳卫百户，随征广西建功，诰封昭讨将军；建文三年辛巳（公元1401年）顺德府南关外阵亡。娶河南怀庆府河内县王氏，生洪武壬子，卒正统丙寅二月初八未时，夫妇俱葬金鄂山

（现名金鹛山）左嘴高坟。生子二：斌、信。斌早卒无嗣。

信公（派名能缙），字敦笃，生洪武己卯（公元1399年）正月初一子时，年八十，卒成化戊戌（公元1478年）九月初七日巳时。成化丙午十二月廿日，葬临湘王禾里练家冲卯酉向。娶淮安张氏，生洪武辛巳十二月十三日丑时，与祖同年共穴。生子一：暹。副娶天津卫北门陈氏，生永乐癸卯九月廿五日，时年七十九，卒弘治壬戌十二月三十日，葬金鹛山（现名金鹛山）方家园，丑未向，生子一：昇。昇公举子三：廉、宁、宸，明末兵燹失传。

暹公（派名成章），字普明，官千户，生宣德丙午（公元1426年）八月十四丑时，年九十三，卒正德戊寅（公元1518年）十一月廿八日申时，葬临湘太平桥杓坝王丘龙坡。娶本城黄土坡李氏，生宣德丁未十二月廿四寅时，年四十三，卒成化己丑五月廿九戌时，本年十二月廿八葬（金鹛山）螺蛳港方家园，卯酉向。生子一：玺。副娶本府剪刀池王氏，生正统己未七月初十日戌时，年六十四，卒弘治壬戌四月初四巳时，弘治甲子十二月廿日葬太平桥练家冲乙辛向。生子二：瑛、玠。

玺公字重器，生景泰癸酉（公元1453年）正月

初一未时，镇两广，开辰州土司，官封千户，诰封安南将军。年五十五，卒正德丁卯（公元1507年）十一月十三卯时，正德戊寅五月十六葬一都蔡家湾，后迁金鄂山（现名金鹗山）卯酉向。娶本府五通祠下童氏，生景泰壬申十一月初四戌时，年八十二，卒嘉靖癸巳正月十三戌时，葬蔡家湾，先与玺祖同穴。生子二：葵、茂。副室朱氏葬平江白水里，生子一：苍。

公元二0一七年岁次丁酉 裔孙谨拜撰

向母刘孺人传

向母刘孺人，彭城士俊公女也，年十七，归向讳震、字周勋、别号浪仙先生。身膺家学，力窥闾奥，有古人风，雍正丙午补弟子员，家素贫，先生日事馆谷，一切家事孺人每身任之，纂组之余即事灌溉，浣濯之外，亲操井臼。先生家事遂以孺人致丰厚矣。性严毅，不以辞色假人。子媳偶违礼，辄加鞭撻，曰：“语云慈母出败子，吾非不爱若曹，恐若曹心无畏忌，不克成人耳。”即至仆隶下人，少有诡行，必不少贷，人亦不怨。其勤且严如此。故至今称有家法，靡不啧啧，谓向氏有妇也。

予尝考古淑媛：若申国之治家以严，敬姜之逸不忘劳。如孺人者，可谓兼之矣。夫居今之世，志古之道，匪爱古而薄今也，诚以其人不易得故，或铭之金石，或被之管弦，后之人闻其风者，每为流连不忍去。况孺人之志行卓卓可纪如此，而使之淹没不可传，可乎？予虽不文，得与郎君交，闻孺人之行最悉，因著其事以备輶轩之采云。孺人生于康熙三十九年庚辰岁三月初八申时，卒于雍正九年辛亥岁正月初一酉时，葬树山林亥山巳向。生子四：文、彬、国、家。

时

乾隆三十年乙未孟夏月上浣
眷晚生胡岩宗望氏顿书

耐庵向老夫子传

耐庵夫子，老先生幼入儒林，日就月将，逊志时敏。不越五年，六经读罢，业师胡命作文字，对众挥毫，果如宿构，似其书有非若今生读者。师惊悟其聪慧，谓异日非止微末功名。先生令严君闻之乐甚，谓足继宋相大耐家声，师随锡别号为耐庵。未几，令严君将原稿乞唐先生郢斫，颇有难色。令严君顿增忧虑，乘先生芸窗读易归，窃恐淡心征迈，无自出人头地，嗔怒频加，先生答以凿壁殷念，口不辍吟，手不停披，有志竟成上进，奚虑于斯时也。洵有以转高堂之忧而为喜矣。自是寝图馈史，摘艳薰香，倾沥液于群言，漱芳润于六艺。采泮沼芹，不等麦驹金玉，扳月宫桂，旋吹苹鹿笙簧。先生庆洽充闾，声华固藉甚矣，无如花砖切咽，苦块怆怀。令严君从兹永诀，岂不痛哉！至嘉庆壬戌中进士第，晏赴琼林，香分玉案，华毂朱轮，抗輶骐驎。因慈母蒋太君日月逾迈，未报和丸画荻之勤，快吁曷极，是以颁敕金花，俯依毡席，弃琴堂而甘任宝庆之教授，养亲而兼养士，诚可称忠孝两全者矣。任五年，病卒官署，扶柩归葬杨信

冲白石觜祖莹伴，惨莫胜言。长男敦五继泮，亦早殒命；次男之子幼郑，郑生凤，凤生福法，并子姓兄弟至今无不恻悼。兹值纂修谱牒，特为录其行实，垂之永久，俾后之人望而知为祥麟威凤，盖代之华也。佑启无缺，于斯益信。

时

道光二十七年中秋后一日

年家眷再晚刑部主政邓清淦顿首拜撰

宝田向老夫子传赞

吾师宝田向老夫子，束发受书，过目成诵，无事督责而自然，猛着祖鞭，器宇轩昂，才华淹博，洵昌江之英彦也。廿余游邑，泮数经房，荐未售，殊深惋惜。道光辛丑悬马帐于星沙，余受业门下，第见咀英嚼华，含商吐角，文词诗赋，矩获先民，诚哉高摘屈、宋，艳浓薰班、马香矣。维时坐春风之和，沾雨之化，耳濡目染，相得益彰，余所以采芹藻、列胶庠，孰非吾师教泽深入所致，况秉性刚直、不稍依阿，生平所为，皆可对人言，一今之司马光也。馆课之余，遇事解纷，群倾说正，乡邻皆以汝南许邵目之。迩年来晨起薰沐，焚香静坐，持诵善书，养性中天，培心上地文章，千古孝友，一家宜其宝树森庭，珍兰绕砌，麟趾凤毛，乐方兴而未艾也。

咸丰乙卯冬，贵族纂修家乘，吾师适为局总，爰不揣固陋，为之志其巅末，谱牒并昭，辉映于无穷，俾后之者知一代之楷模在是，因歌咏以扬其盛。歌曰：吾师韶腹绝等伦，川岳灵秀萃一身。石撮文山波贮海，情兴所至无古人。化雨遥洒安岫烂，斯道渊脉传独真。欲测我师襟宇处，衡云湘月洞庭春。

咸丰六年丙辰中和

受业门下邑庠生欧阳世卫顿首拜撰

向公遵信先生传略

公讳远灼，字遵信，世居昌江西乡向家墩，俊与公里居相距甚近，兼忝姻亚，故自束发受书即耳熟公之行谊。

公性纯孝，事亲无闲言。昆仲六，公行五，长房乏嗣，以其冢君南山继之，乃俊之外舅也。兄友弟恭，已可概见其治家以勤俭为本，训子孙以耕读为业，待族邻尚以忠厚为心，至若修古刹、建桥梁、治道路诸义举，靡不慨然乐输无吝色，乌呼！闻所闻者，已令人钦慕不遑；见所见者，不尤令人称道莫罄乎？洎壬午岁始获登公之堂，挹其丰仪，可敬可亲；聆其言论，有伦有脊，而且伯仲翼翼，子妇熙熙，家庭之内，肃若朝廷。益信齐家本乎修身，身修而后家齐也。最足异者，俊尝侍公谈论通财一节，公云昔某窘迫难堪，吾保借以济燃眉。彼力不能偿，吾又称贷代偿之。论者谓仗义若此，视古人市义焚券为尤难，嗟乎！世之坐拥厚赀遇戚族有急难竟不拔一毛者，当亦闻风少愧矣。

公生平雅好读书，初欲一经教子，仲君东海聪慧异常，坐家贫辍学，凡历史传志以及堪舆、命学、医

方，各种诸书，一见辄能晓其大义，间有不解，则从宿儒老师相问难，久之，胸次豁然。匪独公以课读未终为憾，即知之稔、信之深者，莫不慨叹弗置。然公之心犹未已也。光绪乙酉，俊馆公家，令孙辈与俊游，公属望弥殷，时尝诫以，夜寐夙兴，奋勉于学，越后满孙韵乔诗文蒸蒸日上，无何国制新更，科举告罢，乃竟束书高阁，惜哉。且推其爱孙之心及俊焉，俊名场潦倒，连不得志于有司。公且慰且勉，曰：汝当穷且益坚，有志者事竟成。虽未克副，公之望亦可想见其爱俊之深也。

公仙游之日，俊肄业岳阳，未获匍匐执紼，至今犹耿耿不忘。公家非素封，虽力田而深通大义，晚渐丰饶，杜门不出，惟饮酒以自娱，卒于光绪二十六年庚子岁七月二十五日卯时，葬竹园塋屋下手乙山辛向。德配李孺人，有淑德，钗荆裙布相助为理，今犹康彊无恙，寿登期颐，有不卜而知者，他日拟与公合葬焉。举子六，恢宏先绪，诚能守而兼创。孙曾叠起，俱恂谨朴诚，无世俗浮靡气，方兴正未有艾。所谓积善之家必有余庆，公得之矣。东海岳叔善继公，志每以收族敬宗为念，曩商同族创建祠宇，今复续修家乘，属俊为公表彰懿行，俊不敢辞，谨即见见闻闻，拜首笔之，以纪其大略云。

时

宣统元年岁次己酉夏月谷旦

愚侄孙婿潘俊才迈千氏顿首拜撰